

MEJE PO CARTE JUAN COTACAYA TATINA, POMONAE JESUCRISTO PEJUME COWŪNTSIWI TATINATSI.

BARAPO CARTE PETABŪ CARUCUAE CARTA.

Meje yabara poxonaē Juan jŭntŭ weiweinaya tatina, Gayo tatinatsi

¹Jaco Gayo, pon tacaantobetsi jitom. Xan, pon bayatha pitirin naexanan. Barapo carte cata tinatsi, yaitama bichocono xaniwaicha caantobetsi, jinya nejume cowŭntsixaē Nacom pia pexainyei diwesi jume tatsi.

²Pon tacaantobetsim, pon be tayapin tacanatsicotaeinchi irŭ nejume cowŭntsixaē Nacom. Nacomtha cata wŭcatsi xua jŭntema nepoponaewa tsane xuano xua axaibiya nepoponaewa tsane, icha be ichim xua beta xaniwaicha poponame Nacom peitabaratha tatsi. ³Bichocono jŭntŭ coyene weiweinan poxonaē ichamonae pomonae pejume cowŭntsiwi jiwana taxantha pata yawa netsipaeba. Barapomonae cayabara paeba xua pinae yajŭntŭ coyeneya popona ducuanabiyame Nacom pia pexainyei coyenewa tatsi. Bara xainyei bara barapo coyenewa exaname. ⁴Dapocotsiwa aibi pocotsiwa jume tan pocotsiwa xua nejŭntŭ coyene weiweina exana beyacaincha xua poxonaē jume tan xua tajiwiwimonae xaniwaicha beta jinompa Nacom peitabaratha tatsi pejume cowŭntsixaē Jesucristo.

⁵Pon tacaantobetsim, pon be tayapin tacanatsicotaeinchi irŭ nejume cowŭntsixaē Jesucristo. Bichocono xanepanaya exaname xua Nacom nexa xua poxonaē yawename pomonae Jesucristo pejume cowŭntsiwichi, matautano poxonaē yawename pomonae icha nacuan werena pepatsiwi,

pomonae bequein jopa neyaitae jiwi. ⁶Barapomonae pomonae icha nacuan werena pepatsiwi pomonae Jesucristo pejume cowũntsiwichi jeichichi: “Maisa bichocono pana antobe Gayo tsipei pana yawena”, jei barapomonae. Cawũcatsi xua barapomonae equeicha neyawenaenexa xua pocotsiwa barapomonae nantawenona xua poxonae warapaena jinya neexanaenexa po coyenewa Nacom ichichipa bichocono. ⁷Barapomonae ponarũcũpa xua Jesucristo petanacuichiwa tsainchi. Barapomonae jopa wũcaeyo pomonaetha pomonae jopa pejume cowũntsiwi Nacom xua peyawenaenexatsi pocotsiwa penantawenonaewa. ⁸Daxota bewa barapomonae yawenaetsi xua bapoxonae barapara irũ barapomonae nanabarũ cueicueijeichi pexainyei jume diwesi.

**Meje yabara po diwesi xua Diótrufes abe exana
xuanõ irũ Demetrio beta exana**

⁹Xan caena bayatha icha coyenewiyo tatinan Jesucristo pejume cowũntsiwichi. Daichitha Diótrufes jopa jume cowũntsiyo taitorobi coyenewa, tsipei barapomonae pomonae Jesucristo pejume cowũntsiwichi pia xantha tatsi Diótrufes ichichipa naexana be pon pecanamataxeinaein. ¹⁰Daxota icha ponaein nexainya beya, yabara catsipaebinchi bapon tsipei bapon catsawa neyabara paeba, peabe jumetha. Barapon jopa beta exanaeyo tsipei jopa wũnae weyataeya wabeibiyo pomonaetha pomonae Jesucristo pejume cowũntsiwichi. Irũ pomonae jiwi pententa weyataibiya wabeibiwi, baxuan cui matawentatsi, yawa bapon barapomonae itaweta pomonae Jesucristo pejume cowũntsiwichi itawetatsi.

¹¹Pon tacaantobetsim, pon be tayapin tacanatsicotaeinchi irũ nejume cowũntsixae Jesucristo jopa acuicoyenebeya poponaeinde icha poxonae ichũn ichi xua acuicoyenebeya popona. Saya jame maisa beta exanaponde icha poxonae ichũn ichi xua beta exanapona. Pon ba beta exana pocotsiwa Nacom itoroba apara bara Nacom piamonae jiwi jiwana tatsi. Ichitha pon ba abeya popona, apara jopa poxoru yaputaeyo Nacom.

¹²Daxita jiwi Demetrio xanepanaya yabara paebatsi. Pocotsiwa xua bapon exana, naca yaputane exana xua bara bapon xainyeya peexanaein. Irũ xan xanepanaya yabara paeban Demetrio. Matautano yaputaneme xua pocotsiwa paeban bara xainyei.

Meje yabara xua Juan opi wetaba po carte

¹³Xam Gayo ainya diwesi bequein cataunxuae xeinan xua tacamuxu tsipaebiwa tsainchi, daichitha jopa beyabara tinaeinyo paperatha barapo diwesi. ¹⁴Bara nama methaunxuae catayopiyaeinchi nexata bapoxonae wanatsipaebiwa tsanebe.

¹⁵Bara Nacom jũntema popona caexanaena. Pomonae xote jinompa pomonae be jinya jiwimonae, barapomonae cajacoba. Inta jacobare daxita wajiwimonae. Baja Juan.